

SCRIPT OF MORNING GOJRI NEWS BULLETIN 8AUG 1015 HRS

ما رنینگ گو جری نیو ز بلیٹن مو رخہ 8 اگست 2025

یوہ آکا شوانی جموں ہے محبوب سُلطانی تیں خبر سُنو۔

PM AMRITSAR VANDE BHARAT

جموں ریلوے ٹویزن نے اک جانکاری دیتا واں دسیو ہے جے وزیر اعظم نریندر مودی 10 اگست نانہہ مجازی طور ور وندے بھارت ایکسپریس ٹرین خدمات نانہہ شروع کریں گا جہیڑی امرتسر تے شری ماتا ویشنو دیوی کٹرا بشکار چلے گی مہارا آکاشوانی جموں گا نمائندہ نے جانکاری دتی جے جموں ریل ٹویزن گا سنئیر افسراں نے دسیو ہے جے وندے بھارت ٹرین نمبر 26406 شری ماتا ویشنو دیوی کٹرا توں امرتسر در جے گی جد کہ ٹرین نمبر 26405 امرتسر توں شری ماتا ویشنو دیوی کٹرا در آوے گی ٹرین خدمات گو یوہ سلسلو ہفتہ گا 6 تہاڑے جاری رے غو جدکہ منگلار آلے تہاڑے یہ ٹرین نہیں چلن لگی اس بارے مزید جانکاری دیتا واں دسیو گیو ہے جے ٹرین نمبر 26406 کٹرا توں 6 بج غے 40 منٹ ور چلے گی جہیڑی دوپہر 12 بج غے 20 منٹاں ور امرتسر پُجے گی اس دوران یاہ ٹرین جموں پٹھانکوٹ کینٹ جلندھر سٹی ویاس مانہہ رُکے گی وی جد کہ یاہ ٹرین 4 بج غے 25 منٹ ور امرتسر توں روانہ ویگی جہیڑی رات 10 بجے کٹرا پُجے گی۔

ANANTNAG STATION

شمالی ریلوے نے وادی کشمیر مانہہ اننت ناگ ریلوے سٹیشن نانہہ سمان لے جان آلی ٹریناں واسطے کھول دتو ہے ریلوے گا اک بیان غے مطابق وادی کشمیر مانہہ معاشی سرگرمیاں نانہہ فروغ دین گی اک بڑی کوشش غا طور ور شمالی ریلوے نے باضابطہ طور ور اننت ناگ ریلوے سٹیشن نانہہ سمان آنن تے لے جان واسطے کھول دتو ہے اس فیصلہ تیں بعد اننت ناگ سمان پُجان واسطے پوری طرح تیار ہے جہیڑو پورا کشمیر گا کاروبار واسطے اک نوو تے موثر ٹرانسپورٹ گو موقع فراہم کرے غو۔

CM TRIBAL FESTIVAL

وزیر اعلیٰ عمر عبداللہ نے گریز تے اس گا لوکاں کی ترقی تے فلاح ویہبود واسطے اپنی حکومت گا عزم نانہہ دہرایو ہے گریز گا سرضدی گراں چوروں مانہہ منعقدہ دو روزہ قومی قبائلی میلہ گریز 2025 سنگ خطاب کرتا مانہہ وزیر اعلیٰ نے یقین دہانی کرواتا مانہہ کہیو ہے جے گریز حکومت کی ترجیحات مانہہ سب توں پہلاں بے اُنہاں نے گریز گا لوکاں کی پُر امن فطرت نانہہ سہرایو تے مشکل حال مانہہ امن قائم رکھن واسطے اُن گا عزم نانہہ وی منیو جناب عمر عبداللہ نے گریز وادی گا سیاحتی صلاحیت نانہہ اُجاگر کرتا مانہہ مقامی بسنیکاں ور زور پایو جے وے مل جُل غے گریز نانہہ صاف رکھیں وزیر اعلیٰ نے اس تیں بعد ذرائع ابلاغ گا نمائندہ سنگ گل بات کرتا مانہہ کہیو جے عدالت عظمیٰ نے کہیو تھو جے چناؤ کرایا جائے تے ریاست گو درجو وی تاولے بحال کیو جے چناؤ ہو چکا ہیں تے ہُن ہم چاواں تے جموں کشمیر نانہہ جلد دوبارہ ریاست بنایو جے۔

DYCM BUDDHA AMARNATH

نائب وزیر اعلیٰ سریندر چودھری نے پچھلے تہارے چھڑی مبارک یاترا کا موقعہ ور شری بڈھا امرناتھ جی منڈی گو دورو کر کے مقدس مقام ور حاضری دتی ہے اس دورہ کے دوران اُن غے ہمراہ حویلی توں قانون ساز اسمبلی کا ممبر اعجاز احمد جان اڈیشنل ڈپٹی کمشنر پونچھ تے ضلع گا دوجا افسر وی موجود تھا اس دورہ غے دوران نائب وزیر اعلیٰ نیشری بڈھا امرناتھ جی گا پرانا مزار ور پوجا تے جموں کشمیر گا لوکاں واسطے امن خوشحالی تے ترقی کی دعاوی کی اُنہاں نے اُمید ظاہر کرتا مانہ کہیو جے بھگوان بھولے ناتھ گو کرم تے برکت ہم سب ور ریے تانجے امن تے پائی چارو قائم رے سکے نائب وزیر اعلیٰ نے سوامی ویوکا اندر سرسوتی جی مہاراج سنگ ملاقات وی کی۔

AGRI MINI TWMP

زرعی پیداوار گا وزیر جاوید احمد ڈار نے بیروار آلے تہارے سول سیکرٹریٹ سرینگر مانہ جامع آبی وسائل منیجمنٹ پروگرام کی اپنی ویب سائیت گو افتتاح کیو ہے اس موقعہ ور اُنہاں نے زور پاتا مانہ کہیو جے آئی ٹیلیو ایم پی ویب سائیت کی شروعات گو مقصد شفافیت جوابدی تے شہریاں کی شمولیت نانہ یقینی بنان کی کوشش مانہ اک اہم قدم ہے اُنہاں نے کہیو جے یوہ پورٹل واٹر شیڈ پروجیکٹ بارے حقیقی وقت کی جانکاری فراہم کرے گو جس سنگ شہری زمینی سطحور ترقی وسائل گا استعمال تے دیگر بارے جانکاری حاصل کرسکیں گا۔

JJM

جل جیون مشن نے جموں کشمیر مانہ نمایاں پیش رفت کی تے جون 2025 توڑی 15 عشاریہ 6 لکھ دیہی گھراں یعن کل دیہی گھراں گا 81 فی صد نانہ نلکا گو پانی دستیاب کرایو ہے مہارا آکاشوانی جموں گا نمائندہ غے مطابق یہ جانکاری جل شکتی گا وزیر سر آر پاٹل ت لوک سبھا مانہ اک سوال گا جواب مانہ دتی ہے اس اہم پی شرفت کے باوجود تمام گھراں نانہ 100 فی صد پانی کی فراہمی مانہ اجوں وی کمی ہے کیو جے صرف 1293 گھرایاں نے ہر گھر جل گو دورو حاصل کیو ہے یعنی ان گھراں گا تمام گھراں مانہ نلکا گو پانی آوے۔

SWACHHATA RUN 2025

جموں میونسپل کارپوریشن 10 اگست 2025 نانہ سوچہ رن منعقد کرن جارہی ہے تانجے سالانہ شری امرناتھ جی یاترا نانہ کامیاب انعقاد نے جموں شہر مانہ یاترا کے دوران صفائی نانہ یقینی بنایو جاسکے اک پیغام مانہ جموں میونسپل کونسل گا کمشنر ڈاکٹر دیوانس یادو نے دسیو جے سوا چھتا رن 2025 اتار یعنی 10 اگست نانہ سویرے 5 بجے منعقد کی جے گی اس ضمن مانہ اُنہاں نے جموں گا لوکاں توں اپیل کی جے وے بڑی تعداد مانہ اس دوڑ مانہ حصو لیں تانجے اس نانہ کامیاب تے یاد گار بنایو جاسکے۔
